



বাংলাদেশ ব্যাংক

প্রধান কার্যালয়

মতিঝিল, ঢাকা-১০০০

বাংলাদেশ।

website: www.bb.org.bd

ব্যাংকিং প্রবিধি ও নীতি বিভাগ-১

বিআরপিডি-১ সার্কুলার নং-১৫

৩০ জুলাই ২০২৬

তারিখঃ -----

১৫ শ্রাবণ ১৪৩৩

ব্যবস্থাপনা পরিচালক/প্রধান নির্বাহী কর্মকর্তা

বাংলাদেশে কার্যরত সকল তফসিলি ব্যাংক

প্রিয় মহোদয়,

চামড়া ও চামড়াজাত শিল্পের বিকাশ ও উন্নয়নের লক্ষ্যে প্রাক-অর্থায়ন স্কিম (Pre-finance Scheme) গঠন প্রসঙ্গে।

চামড়া প্রক্রিয়াজাতকরণ এবং চামড়াজাত পণ্য উৎপাদনের মাধ্যমে দেশের অভ্যন্তরীণ চাহিদা মেটানোর পাশাপাশি আন্তর্জাতিক বাজারে রপ্তানির মাধ্যমে বিপুল পরিমাণ বৈদেশিক মুদ্রা অর্জনের সুযোগ রয়েছে। দেশে গবাদি পশু চামড়ার পর্যাপ্ত সরবরাহ থাকা সত্ত্বেও যথাযথ প্রক্রিয়ায় চামড়া সংগ্রহ, সংরক্ষণ ও প্রক্রিয়াজাতকরণের অভাবে সম্ভাবনাময় এ খাত থেকে পর্যাপ্ত উপযোগিতা পাওয়া সম্ভবপর হচ্ছে না। এছাড়াও চামড়া প্রক্রিয়াজাতকরণের ক্ষেত্রে পরিবেশ দূষণ নিরোধসহ অন্যান্য আন্তর্জাতিক মানসমূহ রক্ষায় লেদার ওয়ার্কিং গ্রুপ সার্টিফিকেট অর্জনের পর্যাপ্ত ব্যবস্থা গৃহীত না হওয়ায় চামড়া ও চামড়াজাত শিল্প বৈদেশিক মুদ্রা অর্জনে আশাব্যঞ্জক ভূমিকা পালন করছে না। ফলে, সম্ভাবনাময় এ খাতটিকে একটি টেকসই, পরিবেশবান্ধব এবং প্রতিযোগিতামূলক খাত হিসেবে গড়ে তোলার আবশ্যিকতা রয়েছে। এ বিষয়সমূহ বিবেচনায়, আন্তর্জাতিক মান সম্পন্ন পণ্য উৎপাদন, পরিবেশ বান্ধব কারখানা স্থাপন এবং উন্নত প্রযুক্তি ব্যবহারের মাধ্যমে এ খাত সংশ্লিষ্ট পণ্য দেশের চাহিদাপূরণ করে বিদেশে রপ্তানির মাধ্যমে বৈদেশিক মুদ্রা অর্জন এবং এ খাতে কর্মসংস্থান সৃষ্টির লক্ষ্যে বাংলাদেশ ব্যাংক কর্তৃক ৳২,০০০.০০ (দুই হাজার) কোটি টাকার একটি প্রাক-অর্থায়ন তহবিল গঠন করা হয়েছে। এ তহবিল পরিচালনার ক্ষেত্রে নিম্নোক্ত নীতিমালা অনুসরণীয় হবে:

- ২। **শিরোনাম:** চামড়া ও চামড়াজাত শিল্পের বিকাশ এবং উন্নয়নের লক্ষ্যে প্রাক-অর্থায়ন স্কিম।
- ৩। **তহবিলের পরিমাণ ও উৎস:** ৳২,০০০.০০ (দুই হাজার) কোটি; বাংলাদেশ ব্যাংকের নিজস্ব তহবিল।
- ৪। **অংশগ্রহণকারী ব্যাংক:** বাংলাদেশে কার্যরত সকল তফসিলি ব্যাংক এ প্রাক-অর্থায়ন সুবিধা গ্রহণের যোগ্য বলে বিবেচিত হবে। প্রাক-অর্থায়ন গ্রহণে আগ্রহী ব্যাংককে বাংলাদেশ ব্যাংকের এসএমই এন্ড স্পেশাল প্রোগ্রামস্ ডিপার্টমেন্ট এর সাথে একটি অংশগ্রহণ চুক্তি (Participation Agreement) সম্পাদন করতে হবে।
- ৫। **তহবিল ব্যবস্থাপনা:** এ তহবিলের পরিচালনা/ব্যবস্থাপনা/মনিটরিং সংক্রান্ত কার্যক্রম এসএমই এন্ড স্পেশাল প্রোগ্রামস্ ডিপার্টমেন্ট, বাংলাদেশ ব্যাংক, প্রধান কার্যালয়, ঢাকা কর্তৃক সম্পাদিত হবে।
- ৬। **তহবিলের মেয়াদ:** তহবিলের মেয়াদ হবে ০৩(তিন) বছর। উক্ত মেয়াদে তহবিলটি আবর্তনযোগ্য (Revolving) হবে।
- ৭। **খাত:** নিম্নোক্ত খাতসমূহে এ তহবিলের আওতায় ঋণসুবিধা প্রদান করা যাবে:

(ক) ট্যানারি ও চামড়াজাত পণ্য উৎপাদনের লক্ষ্যে কারখানার অবকাঠামো নির্মাণ/সম্প্রসারণ ও প্রয়োজনীয় যন্ত্রপাতি (machineries) ক্রয়;

(খ) চামড়া ও চামড়াজাত পণ্য সংগ্রহ ও প্রক্রিয়াজাতকরণ/ উৎপাদন;

(গ) কাঁচা ও প্রক্রিয়াজাত চামড়া সংরক্ষণের লক্ষ্যে স্থাপনা ও হিমাগার (Cold Storage) নির্মাণ;

- (ঘ) বর্জ্য ব্যবস্থাপনার লক্ষ্যে পরিশোধনাগার (Effluent Treatment Plant), Dumping Yard, Sewage Treatment Plant (STP) স্থাপন, কঠিন বর্জ্য ব্যবস্থাপনা (Solid waste management) ও ক্লিন টেকনোলজি স্থাপনসহ পরিবেশগত বিষয়াদি নিশ্চিতকল্পে প্রয়োজনীয় অবকাঠামো নির্মাণ;
- (ঙ) লেদার ওয়াকিং গ্রুপ (এলডব্লিউজি) সার্টিফিকেট অর্জনের লক্ষ্যে কমপ্লায়েন্স নিশ্চিতকরণের অন্যান্য ব্যয়;
- (চ) চামড়া প্রক্রিয়াকরণের জন্য প্রয়োজনীয় কেমিক্যাল তৈরীর শিল্প, জুতাসহ চামড়াজাত পণ্যের বিভিন্ন সহায়ক আনুষঙ্গিক পণ্য ও চামড়া শিল্পের বিভিন্ন উপকরণ (accessories) দেশীয়ভাবে উৎপাদন; এবং
- (ছ) প্রক্রিয়াজাত চামড়ার মানোন্নয়নে বিদ্যমান ট্যানারিসমূহের আধুনিকায়ন।

৮। গ্রাহক পর্যায়ে ঋণ/বিনিয়োগ প্রাপ্তির যোগ্যতা ও শর্ত:

- (ক) চামড়া ও চামড়াজাত পণ্য সংশ্লিষ্ট কারখানা স্থাপনে আবশ্যকীয়ভাবে স্থানীয় প্রশাসন, কলকারখানা অধিদপ্তর, পরিবেশ অধিদপ্তরসহ অন্যান্য যথাযথ কর্তৃপক্ষ হতে প্রয়োজনীয় ছাড়পত্র/অনুমোদন থাকতে হবে;
- (খ) কাঁচা চামড়া প্রক্রিয়াকারী প্রতিষ্ঠানসমূহকে এ তহবিলের আওতায় ঋণ বিতরণের ক্ষেত্রে অগ্রাধিকার প্রদান করতে হবে;
- (গ) এ নীতিমালায় বর্ণিত কোনো খাতে Export Development Fund (EDF), রপ্তানি সহায়ক প্রাক-অর্থায়ন তহবিল (Export Facilitation Pre-finance Fund (EFPF)), গ্রীন ট্রান্সফর্মেশন ফান্ড (GTF) সহ বাংলাদেশ ব্যাংক বা সরকার হতে যেকোনো তহবিলের আওতায় কোনো প্রতিষ্ঠান কর্তৃক স্থানীয় বা বৈদেশিক মুদ্রায় গৃহীত ঋণ সুবিধা চলমান থাকলে উক্ত প্রতিষ্ঠানসমূহ আলোচ্য তহবিল হতে একই খাতে ঋণসুবিধা প্রাপ্তির জন্য যোগ্য বলে বিবেচিত হবে না;
- (ঘ) রপ্তানি প্রক্রিয়াকরণ অঞ্চলের অন্তর্ভুক্ত টাইপ-বি ও টাইপ-সি প্রতিষ্ঠানসমূহে এ তহবিলের আওতায় ঋণসুবিধা প্রদান করা যাবে;
- (ঙ) ঋণ মঞ্জুরীর পূর্বে ঋণ চাহিদার বিপরীতে প্রাপ্যতার সীমা নির্ধারণসহ অন্যান্য বিষয়াদি সংশ্লিষ্ট বিধি-বিধান পরিপালন নিশ্চিত করতে হবে;
- (চ) এ তহবিল হতে ঋণসুবিধা প্রদানের ক্ষেত্রে ইতোপূর্বে পুনঃতফসিলকৃত ঋণের বিপরীতে কম্প্রাইজড এমাউন্ট প্রদানের বাধ্যবাধকতা হতে অব্যাহতি প্রাপ্ত হবে;
- (ছ) ব্যাংক কোম্পানী আইন ১৯৯১ অনুসারে খেলাপী হিসেবে চিহ্নিত ঋণগ্রহীতা বা ঋণগ্রহীতা প্রতিষ্ঠানকে এ তহবিলের আওতায় ঋণসুবিধা প্রদান করা যাবে না;
- (জ) অভ্যন্তরীণ উৎস হতে প্রাপ্ত চামড়ার সর্বোচ্চ মূল্য নিশ্চিতকরণের লক্ষ্যে কাঁচা চামড়া ও Crust and Finished Leather আমদানির সাথে যুক্ত প্রতিষ্ঠানের অনুকূলে আলোচ্য তহবিল হতে ঋণ প্রদান করা যাবে না।

৯। ঋণের পরিমাণ:

- (ক) এ তহবিলের আওতায় একজন ঋণগ্রহীতার ঋণ-মূলধন অনুপাত হবে সর্বোচ্চ ৭০ : ৩০;
- (খ) কাঁচা চামড়া (Raw Hide and Skin) প্রক্রিয়াজাতকরণে নতুন ট্যানারি স্থাপন, নতুন শিল্প বর্জ্য পরিশোধনাগার নির্মাণ/ব্যবস্থাপনা, সংরক্ষণের লক্ষ্যে হিমাগারসহ অন্যান্য অবকাঠামো নির্মাণ খাতে এ তহবিলের আওতায় কোনো প্রতিষ্ঠানকে মোট সর্বোচ্চ ৩০ (ত্রিশ) কোটি টাকা প্রকল্প মেয়াদী ঋণ সুবিধা প্রদান করা যাবে;
- (গ) ট্যানারির বিদ্যমান অবকাঠামো সংস্কার, সম্প্রসারণ ও আধুনিকায়নের ক্ষেত্রে এ স্কিমের আওতায় সর্বোচ্চ ১০(দশ) কোটি টাকা মেয়াদী ঋণ সুবিধা প্রদান করা যাবে;
- (ঘ) চামড়াজাত পণ্য তৈরীর লক্ষ্যে নতুন অবকাঠামো নির্মাণ খাতে এ তহবিলের আওতায় সর্বোচ্চ ২০(বিশ) কোটি টাকা মেয়াদী ঋণ সুবিধা প্রদান করা যাবে;
- (ঙ) চামড়াজাত পণ্য তৈরী কারখানার বিদ্যমান অবকাঠামো সংস্কার ও আধুনিকায়নের ক্ষেত্রে এ তহবিলের আওতায় সর্বোচ্চ ১০(দশ) কোটি টাকা মেয়াদী ঋণ সুবিধা প্রদান করা যাবে;

(চ) এ তহবিলের আওতায় কাঁচামাল ক্রয়, বেতন-ভাতা প্রদান, ইউটিলিটি বিল প্রদান ইত্যাদি ক্ষেত্রে চলতি মূলধন ঋণসুবিধা প্রদানের ক্ষেত্রে প্রতিষ্ঠানের বার্ষিক টার্নওভার বিবেচনায় ব্যাংক কর্তৃক সীমা নির্ধারিত হবে। নতুন প্রতিষ্ঠানের ক্ষেত্রে প্রক্ষেপিত টার্নওভার (Projected Turnover) বিবেচনা করতে হবে। তবে কোনক্রমেই উক্ত সীমা ৩০(ত্রিশ) কোটি টাকার অধিক হবে না;

(ছ) চামড়া ও চামড়াজাত পণ্য শিল্পের সহায়ক পণ্য উৎপাদনকারী প্রতিষ্ঠানসমূহকে শুধুমাত্র চলতি মূলধন ঋণ সুবিধা প্রদান করা যাবে যার সীমা ০৫(পাঁচ) কোটি টাকার অধিক হবে না;

(জ) এ তহবিলের আওতায় ঋণ বিতরণের ক্ষেত্রে একক গ্রাহক বা গোষ্ঠীর ঋণসুবিধার সর্বোচ্চ সীমা (Single Borrower Exposure Limit) সংক্রান্ত নীতিমালা যথারীতি অনুসরণীয় হবে।

১০। তহবিলের সুদ হার:

(ক) গ্রাহক পর্যায়ে সুদ হার হবে সর্বোচ্চ ৭%;

(খ) বাংলাদেশ ব্যাংক কর্তৃক জারিকৃত শিডিউল অব চার্জেস সংক্রান্ত বিদ্যমান নীতিমালায় বর্ণিত চার্জ/ফি ব্যতিরেকে গ্রাহকের নিকট হতে অন্য কোন ধরনের চার্জ বা ফি আদায় করা যাবে না;

(গ) বাংলাদেশ ব্যাংক হতে ব্যাংকসমূহ কর্তৃক গৃহীত প্রাক-অর্থায়ন তহবিলের বিপরীতে ৪% হারে সুদ প্রদান করতে হবে।

১১। ঋণ/বিনিয়োগের প্রকৃতি ও মেয়াদ:

(ক) মেয়াদী ঋণ/বিনিয়োগ:

(১) গ্রাহকের চাহিদা অনুযায়ী সর্বোচ্চ ২(দুই) বছরের গ্রেস পিরিয়ডসহ সর্বোচ্চ ৭(সাত) বছর (২ বছর + ৫ বছর) মেয়াদে ঋণ বিতরণ করা যাবে। মাসিক/ত্রৈমাসিক কিস্তিতে এ মেয়াদী ঋণ পরিশোধিত হবে;

(২) বিদ্যমান অবকাঠামো সংস্কার, সম্প্রসারণ ও আধুনিকায়নের ক্ষেত্রে গ্রাহকের চাহিদা অনুযায়ী ব্যাংক সর্বোচ্চ ৬(ছয়) মাসের গ্রেস পিরিয়ডসহ সর্বোচ্চ ৪(চার) বছর (৬মাস + ৩.৫ বছর) মেয়াদে ঋণ বিতরণ করতে পারবে। মাসিক/ত্রৈমাসিক কিস্তিতে এ ঋণ পরিশোধিত হবে;

(৩) উল্লিখিত গ্রেস পিরিয়ডের আরোপিত সুদ সম্পূর্ণ গ্রেস পিরিয়ড সমাপণান্তে ঋণের কিস্তির সাথে পরিশোধ্য হবে।

(খ) চলতি মূলধন ঋণ/বিনিয়োগ: ব্যাংক এ তহবিলের আওতায় ১(এক) বছর মেয়াদে চলতি মূলধন ঋণ প্রদান করতে পারবে। এক্ষেত্রে ব্যাংক প্রচলিত নিয়মানুসারে ব্যাংকার-গ্রাহক সম্পর্কের ভিত্তিতে ঋণ প্রদান করবে এবং ব্যবসায়িক লেনদেন সম্ভোষণকর হলে তা নবায়ন করতে পারবে। তবে, নবায়নের মাধ্যমে কোন গ্রাহক সর্বোচ্চ ৩(তিন) বছর এ তহবিলের আওতায় ঘোষিত সুবিধা প্রাপ্ত হবে।

১২। ঋণ/বিনিয়োগ বিতরণ পদ্ধতি:

(ক) গ্রাহকের প্রয়োজন ও যোগ্যতা বিবেচনায় বিদ্যমান বিধি-বিধান অনুসরণপূর্বক ব্যাংকার-গ্রাহক সম্পর্কের ভিত্তিতে এ তহবিলের আওতায় ঋণ/বিনিয়োগ মঞ্জুরী করতে হবে;

(খ) মেয়াদী ঋণের ক্ষেত্রে ঋণের সদ্যবহার নিশ্চিতকরণপূর্বক বিভিন্ন কিস্তিতে ব্যাংক মঞ্জুরিকৃত ঋণ বিতরণ করতে পারবে। এক্ষেত্রে, কিস্তির পরিমাণ ন্যূনতম ০৩(তিন) টি হতে হবে;

(গ) ব্যাংক কর্তৃক গ্রাহককে প্রদেয় মেয়াদী ঋণের কিস্তির অনুরূপভাবে বাংলাদেশ ব্যাংক হতে সংশ্লিষ্ট ব্যাংককে প্রাক-অর্থায়ন করা হবে।

১৩। তহবিল প্রাপ্যতা: বাংলাদেশ ব্যাংকের সংশ্লিষ্ট বিধি-বিধান পরিপালন সাপেক্ষে ব্যাংক তার নিজস্ব নীতিমালার আওতায় কোনো গ্রাহকের অনুকূলে ঋণ/বিনিয়োগ বিতরণের সিদ্ধান্ত গ্রহণ করতে পারবে। তবে, এ তহবিলের আওতায় সুবিধা প্রাপ্তির ক্ষেত্রে ঋণটি আবশ্যিকভাবে সংশ্লিষ্ট ব্যাংকের পরিচালনা পর্ষদ কর্তৃক অনুমোদিত হতে হবে। তহবিলের আওতায় ঋণ/বিনিয়োগ মঞ্জুরীর পূর্বে সংশ্লিষ্ট ব্যাংক বাংলাদেশ ব্যাংকের তহবিল পরিচালনাকারী বিভাগ হতে তহবিলের প্রাপ্যতার (availability)

বিষয়ে তথ্য সংগ্রহ করতে পারবে। গ্রাহকের অনুকূলে ঋণ মঞ্জুরীর পর ব্যাংক এ তহবিলের আওতায় প্রাক-অর্থায়নের জন্য আবেদন দাখিল করতে পারবে। বাংলাদেশ ব্যাংক কর্তৃক প্রাক-অর্থায়ন প্রদানের পর ব্যাংক সংশ্লিষ্ট গ্রাহকের অনুকূলে ঋণ বিতরণ করবে। বাংলাদেশ ব্যাংক হতে প্রাক-অর্থায়ন সুবিধা প্রাপ্তি সাপেক্ষে নীতিমালায় বর্ণিত সুদহার ও মেয়াদ প্রযোজ্য হবে মর্মে সংশ্লিষ্ট ব্যাংক সংশ্লিষ্ট গ্রাহককে প্রদত্ত মঞ্জুরীপত্রের শর্তে উল্লেখ করতে পারবে।

১৪। প্রাক-অর্থায়ন আবেদনের পদ্ধতি:

- ক) অংশগ্রহণকারী ব্যাংক গ্রাহকের অনুকূলে ঋণ মঞ্জুরীর পর প্রাক-অর্থায়ন সুবিধার জন্য বাংলাদেশ ব্যাংকের নির্ধারিত ছকে পরিচালক, এসএমই এন্ড স্পেশাল প্রোগ্রামস্ ডিপার্টমেন্ট, বাংলাদেশ ব্যাংক, প্রধান কার্যালয় বরাবর আবেদন করতে পারবে;
- খ) বাংলাদেশ ব্যাংক কর্তৃক প্রয়োজনীয় তথ্য/দলিলাদি যাচাই সাপেক্ষে প্রাক-অর্থায়ন সুবিধা প্রদান করা হবে যা সংশ্লিষ্ট ব্যাংকের চলতি হিসাবে ক্রেডিট করা হবে;
- গ) আবেদনপত্রের সাথে নিম্নবর্ণিত দলিল/তথ্যাদি দাখিল করতে হবে:
 - ১) ঋণ প্রস্তাব ও এতদসংক্রান্ত দলিলাদি (ডিউ ডিলিজেন্স সংক্রান্ত দলিলাদি যেমন: বোর্ড/ইসির মেমো, উদ্ধৃতিপত্র, কার্যবিবরণী, ক্রেডিট কমিটির রিপোর্ট ও অন্যান্য প্রয়োজনীয় কার্য সম্পাদনের সমর্থনে দলিলাদি);
 - ২) ঋণ মঞ্জুরীপত্র (সংশ্লিষ্ট গ্রাহক সম্মতির প্রমাণসহ);
 - ৩) সংশ্লিষ্ট গ্রাহকের সর্বশেষ নিরীক্ষিত আর্থিক প্রতিবেদন (প্রযোজ্য ক্ষেত্রে);
 - ৪) গ্রাহকের হালনাগাদ সিআইবি রিপোর্ট;
 - ৫) সংশ্লিষ্ট খাতে উৎপাদন/কারখানা পরিচালনার জন্য যথাযথ কর্তৃপক্ষ ইস্যুকৃত প্রয়োজনীয় অনুমোদন/ছাড়পত্র/অনাপত্তি ইত্যাদি দলিলাদি ব্যাংক কর্তৃক নিয়মমাফিক পরীক্ষা ও যাচাই করা হয়েছে মর্মে ব্যাংক কর্মকর্তা কর্তৃক স্বাক্ষরিত প্রত্যয়নপত্র;
 - ৬) প্রাক-অর্থায়নের জন্য আবেদনকৃত অর্থ নির্ধারিত সময়ে পরিশোধের বিষয়ে ব্যাংক কর্তৃক প্রদত্ত প্রতিশ্রুতিপত্র (ডিপি নোট);
 - ৭) সংশ্লিষ্ট ঋণ/বিনিয়োগ বিতরণসূচী ও পরিশোধসূচী (repayment schedule); এবং
 - ৮) এসএমই এন্ড স্পেশাল প্রোগ্রামস্ ডিপার্টমেন্ট কর্তৃক যাচিত অন্য যে কোনো প্রয়োজনীয় দলিল/প্রমাণক।
- ঘ) প্রাক-অর্থায়নের আবেদনপত্র ও তদুৎসংশ্লিষ্ট সংযোজনীসমূহ অংশগ্রহণ চুক্তি সম্পাদনকারী ব্যাংকের ব্যবস্থাপনা পরিচালক/প্রধান নির্বাহী বা তাঁর কর্তৃক মনোনীত কর্মকর্তার স্বাক্ষরে দাখিল/প্রেরণ করা যাবে। তবে, প্রথমবার মনোনীত কর্মকর্তার স্বাক্ষরে দাখিল করার ক্ষেত্রে সংশ্লিষ্ট কর্মকর্তার নমুনা স্বাক্ষরসহ ব্যবস্থাপনা পরিচালক/প্রধান নির্বাহী কর্তৃক একটি অথরাইজেশন লেটার প্রেরণ করতে হবে।

১৫। প্রাক-অর্থায়নের জন্য আবেদন দাখিলের সময়সীমা: অংশগ্রহণকারী ব্যাংক কর্তৃক গ্রাহকের অনুকূলে ঋণ মঞ্জুরীর পর ১৫(পনের) কার্যদিবসের মধ্যে এসএমই এন্ড স্পেশাল প্রোগ্রামস্ ডিপার্টমেন্ট, বাংলাদেশ ব্যাংক, প্রধান কার্যালয় বরাবর আবেদন দাখিল করতে হবে। তহবিলের আওতায় চলতি মূলধন ঋণের নবায়নের ক্ষেত্রে মেয়াদোত্তীর্ণের ন্যূনতম ৩০(ত্রিশ) দিন আগে বাংলাদেশ ব্যাংক বরাবর আবেদন করতে হবে।

১৬। আদায়:

- (ক) প্রাক-অর্থায়ন বাবদ ব্যাংক কর্তৃক গৃহীত ঋণ বাংলাদেশ ব্যাংকে রক্ষিত অংশগ্রহণকারী ব্যাংকের চলতি হিসাবে প্রদানের পর নির্ধারিত তারিখ হতে গ্রেস পিরিয়ড হিসাবায়নকরত তা সমাপণান্তে সুদসহ উক্ত হিসাব হতে ত্রৈমাসিক ভিত্তিতে কর্তন করা হবে। তহবিলের প্রাপ্যতা বিষয়ক আবেদনের সাথে সংযুক্ত পরিশোধসূচীর সাথে সামঞ্জস্য রেখে গ্রেস পিরিয়ড বিবেচনায় উক্ত তারিখ নির্ধারিত হবে;

(খ) চলতি মূলধন ঋণের ক্ষেত্রে ত্রৈমাসিক ভিত্তিতে অংশগ্রহণকারী ব্যাংকের চলতি হিসাব হতে সুদ আদায় করা হবে এবং মেয়াদান্তে অবশিষ্ট সুদসহ সমুদয় অর্থ আদায় করা হবে;

(গ) গ্রাহক পর্যায়ে বিতরণকৃত ঋণ আদায়ের সকল দায়-দায়িত্ব ঋণ বিতরণকারী ব্যাংকসমূহের ওপর ন্যস্ত থাকবে। গ্রাহক পর্যায়ে ঋণ আদায়ের সাথে বাংলাদেশ ব্যাংকের পাওনাকে সম্পর্কিত করা যাবে না।

১৭। তদারকি:

(ক) ঋণ বিষয়ক যাবতীয় ঝুঁকি সংশ্লিষ্ট ব্যাংক কর্তৃক বহন করতে হবে এবং সরকারের শিল্প, উৎপাদন, রপ্তানি, পরিবেশ ইত্যাদি সংক্রান্ত নীতিমালা পরিপালনের বিষয়টি ব্যাংক কর্তৃক নিশ্চিত করতে হবে;

(খ) যথাসময়ে ঋণ পরিশোধে গ্রাহক ব্যর্থ হলে তা বিদ্যমান নীতিমালা অনুযায়ী শ্রেণিকরণ করতে হবে এবং প্রভিশন সংরক্ষণ করতে হবে;

(গ) আলোচ্য প্রাক-অর্থায়ন তহবিলের আওতায় ব্যাংক কর্তৃক বিতরণকৃত ঋণের সদ্যবহার নিয়মিত মনিটরিং এর মাধ্যমে নিশ্চিত করতে হবে। সাপ্তাহিক ভিত্তিতে সুবিধাপ্রাপ্ত প্রতিষ্ঠানের Sales/Revenue Report গ্রাহকের নিকট হতে সংগ্রহ করতে হবে। তাছাড়া, ত্রৈমাসিক ভিত্তিতে ব্যাংক কর্তৃক সংশ্লিষ্ট প্রতিষ্ঠানের কারখানা/কার্যালয় পরিদর্শন করত পরিদর্শন প্রতিবেদন প্রণয়ন করতে হবে;

(ঘ) অর্থায়ন সংক্রান্ত যে কোনো তথ্য, কাগজপত্র এবং দলিলাদির কপি সময় সময় বাংলাদেশ ব্যাংকের চাহিদার প্রেক্ষিতে অংশগ্রহণকারী ব্যাংক কর্তৃক সরবরাহ করতে হবে;

(ঙ) বাংলাদেশ ব্যাংক প্রয়োজন মনে করলে ঋণের সদ্যবহার নিশ্চিত হওয়ার জন্য প্রাক-অর্থায়নের পূর্বে বা পরে যে কোনো সময় এ কর্মসূচীর আওতায় ব্যাংক শাখা এবং ঋণগ্রহীতার কারখানা/অফিস-এ পরিদর্শন কার্যক্রম পরিচালনা করতে পারবে;

(চ) বাংলাদেশ ব্যাংক কর্তৃক সরেজমিনে যাচাইয়ের নিমিত্ত তহবিলের আওতায় প্রাক-অর্থায়ন সংশ্লিষ্ট তথ্য ও কাগজপত্রাদি ব্যাংক শাখায় যথাযথভাবে সংরক্ষণ করতে হবে;

(ছ) তহবিলের মেয়াদকালে বা পরবর্তীতে যে কোনো সময় বিতরণকৃত ঋণের সদ্যবহার হয়নি মর্মে উদঘাটিত হলে বা এ নীতিমালায় বর্ণিত কোন শর্ত লঙ্ঘিত হলে পুনঃঅর্থায়ন বাবদ প্রদত্ত অর্থ সংশ্লিষ্ট ব্যাংকের চলতি হিসাব হতে ব্যাংক কর্তৃক গ্রাহককে প্রদত্ত হার+২% হার সুদে এককালীন কর্তন করা হবে।

১৮। রিপোর্টিং/প্রতিবেদন দাখিল: অংশগ্রহণকারী ব্যাংকের ব্যবস্থাপনা পরিচালক/প্রধান নির্বাহী কর্মকর্তা অথবা তাঁর মনোনীত কর্মকর্তার স্বাক্ষরে ত্রৈমাসিক ভিত্তিতে ঋণ বিতরণ ও আদায় সংক্রান্ত তথ্য এসএমই এন্ড স্পেশাল প্রোগ্রামস্ ডিপার্টমেন্ট কর্তৃক নির্ধারিত ছক অনুযায়ী সংশ্লিষ্ট ত্রৈমাস অস্ত্রে পরবর্তী মাসের ১০ তারিখের মধ্যে উক্ত বিভাগে দাখিল করতে হবে।

১৯। অন্যান্য শর্তাদি:

(ক) এ তহবিলের আওতায় গৃহীত চলতি মূলধন ঋণ হিসাবের স্থিতি মঞ্জুরীকৃত ঋণসীমা অতিক্রম করতে পারবে না। তবে সুদারোপসহ অন্য কোন কারণে তা মঞ্জুরীকৃত ঋণসীমা অতিক্রম করলে প্রতি ত্রৈমাসিক শেষে পরবর্তী ১০(দশ) দিনের মধ্যে ঋণগ্রহীতা তা পরিশোধ/সমন্বয় করবে। অন্যথায় সীমাতিরিক্ত ঋণদায়ের উপর ব্যাংক প্রচলিত হারে সুদ আরোপ করতে পারবে এবং তা তহবিলের আওতায় দায় হিসেবে বিবেচিত হবে না;

(খ) প্রাক-অর্থায়ন সুবিধার আওতায় কোনো গ্রাহক ঋণ গ্রহণ করলে উক্ত গ্রাহকের যাবতীয় লেনদেন আবশ্যিকভাবে ঋণ বিতরণকারী ব্যাংকের মাধ্যমে সম্পাদিত হতে হবে। প্রকল্প ঋণ প্রদানের ক্ষেত্রে সংশ্লিষ্ট ব্যাংকে প্রকল্পের আয় হিসাব খোলার বাধ্যবাধকতা প্রসঙ্গে জারিকৃত বিআরপিডি সার্কুলার নং-০১, তারিখ: ১৮ জানুয়ারি ২০২৪ এর নির্দেশনা যথাযথভাবে অনুসরণ করতে হবে;

(গ) এ তহবিলের আওতায় গৃহীত ঋণ দিয়ে বিদ্যমান কোনো ঋণ হিসাব সমন্বয়/পরিশোধ করা যাবে না;

(ঘ) ঋণগ্রহীতা নির্বাচন, ঋণ সুবিধা মঞ্জুরী/বিতরণ, প্রয়োজনীয় জামানত গ্রহণ, ঋণ সংশ্লিষ্ট দলিলাদি সম্পাদন, ঋণের সদ্যবহার ও ঋণ বিতরণ পরবর্তী তদারকির ব্যাপারে সংশ্লিষ্ট ব্যাংক তাদের নিজস্ব ঝুঁকি ব্যবস্থাপনা

নীতিমালার পাশাপাশি এ সংক্রান্ত বাংলাদেশ ব্যাংকের নির্দেশনাসহ বিদ্যমান অন্যান্য আইনকানুন ও বিধি-বিধান অনুসরণ করবে;

(ঙ) ঋণের সদ্যবহার নিশ্চিতকল্পে যে ঋণগ্রহীতা প্রতিষ্ঠানের অনুকূলে অর্থায়ন সুবিধা প্রদান করা হবে সে প্রতিষ্ঠানের পরিচালনা পর্ষদে সংশ্লিষ্ট ব্যাংকের একজন প্রতিনিধি অথবা প্রয়োজনে যেকোনো বিশেষজ্ঞ ব্যক্তিকে ব্যাংক নিয়োজিত করতে পারবে। উক্ত তহবিলের আওতায় ঋণ গ্রহণের পূর্বশর্ত হিসেবে এ বিষয়ে ঋণগ্রহীতা প্রতিষ্ঠানের লিখিত সম্মতি গ্রহণ করতে হবে।

২০। বিশেষ শর্তাবলী:

(ক) তহবিলের আওতায় ঋণ প্রাপ্তির পর হতে ০২ বছরের মধ্যে চামড়া প্রক্রিয়াজাতকারী প্রতিষ্ঠানকে লেদার ওয়ার্কিং গ্রুপ (LWG) সার্টিফিকেশন প্রাপ্তির প্রমাণাদি সংশ্লিষ্ট ব্যাংকে দাখিল করতে হবে;

(খ) এ তহবিলের আওতায় সুবিধাভোগী প্রতিষ্ঠানের বিদ্যুৎ চাহিদার ন্যূনতম ১০ শতাংশ সৌর-বিদ্যুৎ উৎস হতে আহরণের জন্য পরবর্তী ০২ বছরের মধ্যে প্রয়োজনীয় ব্যবস্থা গ্রহণ করতে হবে;

(গ) আলোচ্য খাতে কর্মরত কর্মকর্তা/কর্মচারী/শ্রমিকদের পেশাগত স্বাস্থ্য ঝুঁকি নিরসন নিশ্চিতকল্পে প্রতিষ্ঠান কর্তৃক প্রয়োজনীয় ব্যবস্থা গ্রহণ করতে হবে; এবং

(ঘ) বিশেষ শর্তাবলী পরিপালনে ব্যর্থ হলে পরবর্তীতে উক্ত প্রতিষ্ঠানকে এ তহবিলের আওতায় বা বাংলাদেশ ব্যাংকের অন্য কোনো তহবিলের আওতায় ঋণ সুবিধা প্রদান করা হবে না।

২১। ইসলামী শরীয়াহ্ ভিত্তিক বিনিয়োগের ক্ষেত্রে বিশেষ নির্দেশনা: ইসলামী শরীয়াহ্ ভিত্তিক পরিচালিত ব্যাংকের বিনিয়োগ ও অন্যান্য ব্যাংকের ইসলামিক ব্যাংকিং পদ্ধতির মাধ্যমে অনুমোদিত বিনিয়োগের ক্ষেত্রে ব্যাংকসমূহ উপর্যুক্ত শর্তাদির ব্যত্যয় না করে স্থায় অনুমোদিত বিনিয়োগ পদ্ধতির ভিত্তিতে এ তহবিলের আওতায় গ্রাহককে বিনিয়োগ প্রদান করবে। এক্ষেত্রে এসএমই এন্ড স্পেশাল প্রোগ্রামস্ ডিপার্টমেন্ট কর্তৃক নির্ধারিত প্রাক-অর্থায়ন পদ্ধতিতে তহবিল হতে অর্থায়ন সুবিধা গ্রহণ করা যাবে।

২২। এ সার্কুলারে বর্ণিত তহবিল সংক্রান্ত নির্দেশনা সময় সময় পরিবর্তন/পরিবর্ধন/সংযোজন/পরিমার্জন করার ক্ষমতা বাংলাদেশ ব্যাংক সংরক্ষণ করে।

২৩। ব্যাংক কোম্পানী আইন, ১৯৯১ এর ৪৫ ধারায় প্রদত্ত ক্ষমতাবলে এ নির্দেশনা জারি করা হলো যা অবিলম্বে কার্যকর হবে।

আপনাদের বিশ্বস্ত,



(গাজী মোঃ মাহফুজুল ইসলাম)

পরিচালক (বিআরপিডি)

ফোন: ৯৫৩০২৫২